

Menangani Kesan Urbanisasi terhadap Gereja Pedalaman: Kajian Kes Gereja BEM Hosanna Empili, Simunjan, Sarawak (2023)

Oleh:
Donald A. Ginyan
Doctor of World Christian Studies (Cand.)

Abstrak

Kajian ini meneliti kesan urbanisasi terhadap gereja di pedalaman, dengan fokus khusus pada Gereja BEM Hosanna Empili di Simunjan, Sarawak. Laporan bancian Jabatan Statistik Malaysia menunjukkan kadar urbanisasi di negara ini melonjak daripada 28.4% kepada 75.1% dalam tempoh lima puluh tahun. Urbanisasi telah menyebabkan peralihan demografi yang signifikan, khususnya kehilangan potensi pemimpin evangelikal untuk gereja di pedalaman. Kajian kes ini bertujuan untuk memahami kesan urbanisasi ke atas kehidupan bergereja di Gereja BEM Hosanna Empili dengan membangunkan profil jemaat serta mengenalpasti cabaran utama yang dihadapi.

Kajian ini menggunakan pendekatan kualitatif melalui kaedah kajian kes, melibatkan senarai keluarga dalam Buku Daftar Gereja serta wawancara dan pemerhatian lapangan. Dapatan kajian menunjukkan bahawa faktor umur, tahap pendidikan, ekonomi, dan ketiadaan pastor adalah antara kesan utama yang dihadapi oleh gereja. Beberapa pendekatan disyorkan untuk menangani isu-isu ini agar gereja pedalaman dapat terus berfungsi dengan mampan. Kajian ini turut mencadangkan kerjasama dan bantuan daripada komuniti Kristian di bandar serta agensi kerajaan bagi menangani cabaran yang dihadapi oleh gereja pedalaman dalam era urbanisasi.

Kata Kunci: Urbanisasi, Gereja Pedalaman, Gereja BEM Hosanna Empili, Kepimpinan Gereja, Kesan Urbanisasi, Jemaat, Kristian.

Latar Belakang Kajian

Akhbar The Star pada 23 Disember 2022 melaporkan hasil bancian oleh Jabatan Statistik Malaysia menunjukkan kadar urbanisasi di Malaysia melonjak tiga kali ganda daripada 28.4% kepada 75.1% dalam tempoh lima puluh tahun ini.¹ Lausanne Movement dalam artikel bertarikh 6 Januari 2023, yang bertajuk *Ten Questions That Will Shape 2025* mencatatkan persoalan “Kita tahu peralihan demografi akan mendorong perubahan, tetapi bagaimanakah gereja akan merapatkan jurang dan merebut peluang yang datang dengan perubahan tersebut?”² Mark Hutchinson dan John Wolffe mencatatkan bahawa Perang Besar mengakibatkan kematian atau kecacatan ramai pemimpin evangelis masa depan yang berpotensi.³ Fokus dan strategi terkini penginjilan yang telah dimaklumkan kepada gereja-gereja Borneo Evangelical Mission (BEM) di bandar oleh Komiti Misi dan Penginjilan BEM Sarawak ialah penginjilan bandaraya. Strategi ini bukan sesuatu yang baru kerana Mark Hutchinson dan John Wolffe juga memperhatikan peralihan strategi misi ke arah penumpuan yang lebih pragmatik pada bidang yang menghasilkan pulangan yang paling besar.⁴

Kesan urbanisasi yang mendorong kepada peralihan demografi, kehilangan pemimpin evangelikal yang berpotensi untuk kepimpinan gereja pedalaman di masa akan datang dan keadaan gereja pedalaman yang tidak mempunyai pastor mencetus idea bagi kajian ini. Tambahan pula, inilah keadaan yang diperhatikan sedang dialami oleh gereja-gereja BEM di pedalaman seperti Gereja BEM Hosanna Empili, Gereja BEM Shalom Gawang dan Gereja BEM

¹ N. Trisha, Urbanisation rate tripled from 28.4% to 75.1% in last 50 years, census shows,” The Star, 23 December 2022, 3:17 p.m., <https://www.thestar.com.my/news/nation/2022/12/23/urbanisation-rate-tripled-from-284-to-751-in-last-50-years-census-shows>

² Matthew Niermann, “Ten Questions That Will Shape 2025,” *Lausanne Movement*, 6 January 2023, <https://lausanne.org/about/blog/ten-questions-that-will-shape-2050>

³ Mark Hutchinson and John Wolffe, *A Short History of Global Evangelicalism* (Cambridge University Press, 2012), 155.

⁴ Mark Hutchinson and John Wolffe, *A Short History of Global Evangelicalism*, 169.

Kampung Sual yang dikunjungi dalam rangka program Pelayanan Misi dan Penginjilan gereja BEM Kuching Bahasa Malaysia.

Ciri khusus Gereja BEM Hosanna Empili ialah bilangan keluarga yang berdaftar dalam Buku Daftar Gereja adalah dua puluh tujuh keluarga, tetapi kehadiran di kebaktian Ahad hanya dalam lingkungan tiga puluh ke empat puluh orang sahaja. Kebanyakan jemaat yang hadir terdiri daripada orang dewasa yang berumur empat puluh lima tahun ke atas. Kunjungan ke rumah-rumah semasa pelayanan khusus juga mendapati kebanyakan orang yang mendiami rumah keluarga adalah golongan tua dan kanak-kanak. Secara am, jawapan yang diberi berkenaan fenomena ini ialah anak dan menantu serta keluarga mereka sudah berpindah untuk tinggal di bandar. Faktor urbanisasi dilihat memberi kesan terhadap gereja ini.

Tujuan dan Konteks Kajian

Kajian ini bertujuan untuk menangani kesan urbanisasi terhadap gereja di pedalaman, secara khusus Gereja BEM Hosanna Empili sebagai kajian kes. Kajian ini berusaha menjana profil jemaat Gereja BEM Hosanna Empili untuk memahami sejauh mana kesan urbanisasi mempengaruhi kehidupan bergereja di situ. Melalui profil ini, cabaran-cabaran yang ketara akan dibincangkan, dengan harapan akan mencetus idea untuk membangunkan perancangan yang lebih bersasar terhadap keperluan jemaat bagi kehidupan bergereja yang lebih mampan.

Kampung Empili adalah perkampungan masyarakat Iban yang terletak di penghujung jalan Gawang-Empili di daerah Simunjan, Sarawak. Fasiliti kerajaan yang terdekat ialah SK Gawang-Empili yang terletak kira-kira dua kilometer dari kampung tersebut. Pekan terdekat ialah pekan Simunjan, yang terletak kira-kira 48-kilometer ke arah barat laut, manakala bandar terdekat ialah bandar Serian, yang terletak 62 kilometer ke arah barat. Kampung Empili dihubungkan dengan jalan kampung yang sudah berturap, sudah mendapat bekalan elektrik dan air, namun akses internet masih terhad.

Hampir keseluruhan penduduk kampung beragama Kristian. Pada masa ini denominasi yang mempunyai jemaat di Empili ialah Borneo Evangelical Mission, Anglican, Roman Catholic dan Seventh-day Adventist. Denominasi yang sudah mendirikan bangunan gereja di kampung ini ialah BEM. Bangunan gereja BEM Hosanna Empili telah siap dibina pada tahun 2011 dengan bantuan biaya dan sokongan oleh gereja BEM Kuching dan gereja dari Korea Selatan.

Kajian ini bertumpu di kalangan jemaat BEM Hosanna Empili. Gereja ini pernah digembalakan sepenuh masa oleh seorang pastor-penginjil yang diutus oleh Gereja BEM Kuching Bahasa Malaysia dari tahun 2011 sehingga tahun 2018. Setelah pastor-penginjil tersebut berpindah, tugas penyelenggaraan kebaktian dipikul oleh pemimpin gereja, dibantu melalui kunjungan oleh ketua BEM Zon Simunjan dan pasukan dari Gereja BEM Kuching Bahasa Malaysia.

Soalan Kajian

Persoalan utama yang menuntun kajian ini ialah:

“Apakah penanganan yang diperlukan oleh jemaat BEM Hosanna Empili yang terkesan oleh proses urbanisasi bagi membolehkan gereja BEM Hosanna Empili berfungsi dengan mampan?”

Terdapat tiga sub-soalan yang mendasari persoalan utama kajian ini, iaitu:

- 1) Apakah pemahaman alkitabiah tentang gereja yang berfungsi?
- 2) Apakah persepsi jemaat mengenai faktor umur dan tahap pelajaran dalam melaksanakan pengajaran Alkitab dan kepimpinan gererja?
- 3) Bagaimana persepsi ini mempengaruhi peranan dan pelayanan mereka di gereja?

Kaedah dan Batasan Kajian

Kajian ini mengambil pendekatan secara kualitatif, menggunakan kaedah kajian kes. Kajian ini mengguna-pakai senarai keluarga dan nama jemaat yang terdapat dalam Buku Daftar Gereja BEM Hosanna Empili. Soal selidik, wawancara dan pemerhatian lapangan digunakan dalam proses mengumpul data.

Kajian ini terhad kepada jemaat yang tersenarai dalam Buku Daftar Gereja BEM Hosanna Empili. Melalui senarai ini maklumat julat umur, tahap pendidikan dan lokasi kediaman jemaat diperolehi berdasarkan soal-selidik dan wawancara dengan ahli keluarga yang masih berada di kampung. Bahasa pengantar utama yang digunakan ialah Bahasa Melayu dengan beberapa penerangan disampaikan menggunakan Jaku Iban oleh seorang penterjemah.

Carta yang diperolehi dari kajian ini digunakan untuk menentukan profil umur dan tahap pelajaran jemaat yang masih


berada di kampung. Profil ini menjadi rujukan untuk mencartakan, mencadangkan dan mengaplikasi strategi yang sesuai untuk menangani kesan urbanisasi terhadap kepimpinan dan kehidupan bergereja di pedalaman. Dapatan daripada kajian ini diharap dapat diaplikasikan pada gereja-gereja BEM luar bandar yang mencari profil yang serupa.

Hasil Kajian dan Analisa

Soalan kajian soal selidik dibuat dengan menyenaraikan enam kategori, iaitu peranan di dalam keluarga, jantina, umur, pendidikan tertinggi, tempat tinggal dan jika tinggal di bandar, apa tujuan di bandar. Kategori peranan dalam keluarga dibahagikan kepada bapa, ibu, anak, datuk, nenek, cucu atau menantu. Kategori jantina adalah lelaki atau perempuan. Kategori umur dibahagikan kepada julat umur 12 tahun dan ke bawah, 13 hingga 17 tahun, 18 hingga 25 tahun, 26 hingga 40 tahun, 41 hingga 60 tahun atau lebih daripada 60 tahun. Kategori pendidikan tertinggi dibahagikan kepada lulusan Darjah Enam, Tingkatan Tiga (LCE/SRP/PMR), Tingkatan Lima (MCE/SPM), Sijil (STPM/Diploma), Sarjana Muda, Sarjana atau tiada pendidikan formal. Kategori tempat tinggal dibahagikan kepada Kampung, Bandar atau Asrama. Jika tinggal di bandar, sebab yang ingin diketahui ialah sama ada kerana belajar, bekerja atau bersama keluarga.

Sebanyak 27 keluarga tersenarai dalam Buku Daftar Gereja BEM Hosanna Empili. Jumlah nama yang tersenarai ialah 181 orang, dengan 48 peratus lelaki dan 52 peratus perempuan. Data bagi kategori peranan ialah 12 peratus bapa, 13 peratus ibu, 46 peratus anak, tiada datuk, satu peratus nenek, 18 peratus cucu dan lapan peratus menantu. Data bagi kategori umur ialah terdapat enam peratus berumur 12 tahun dan ke bawah, tujuh peratus berumur 13 hingga 17 tahun, sembilan peratus berumur 18 hingga 25 tahun, 33 peratus berumur 26 hingga 40 tahun, 22 peratus berumur 41 hingga 60 tahun dan 19 peratus berumur lebih daripada 60 tahun. Data bagi kategori pendidikan tertinggi ialah 17 peratus lulusan Darjah Enam, sembilan peratus lulusan Tingkatan Tiga (LCE/SRP/PMR), 36 peratus lulusan Tingkatan Lima (MCE/SPM), 11 peratus lulusan Sijil (STPM/Diploma), dua peratus lulusan Sarjana Muda, kurang daripada satu peratus lulusan Sarjana dan 19 peratus tiada pendidikan formal. Kategori tempat tinggal mencatatkan 48 peratus tinggal di kampung, 48 peratus tinggal di bandar dan empat peratus tinggal di asrama. Bagi mereka yang tinggal di bandar, 21 peratus disebabkan belajar, 59 peratus kerana bekerja dan 20 peratus kerana bersama keluarga.


Analisa lanjut terhadap kaitan di antara faktor umur dengan tempat tinggal mendapati bahawa lingkungan umur yang paling ramai tinggal di kampung berbanding di bandar ialah bawah 12 tahun dan melebihi 60 tahun. Lingkungan umur paling ramai tinggal di asrama ialah 13 hingga 17 tahun, yang melibatkan pelajar sekolah menengah yang belajar di SMK Balai Ringin, Serian. Mereka yang berumur 18 tahun sehingga 60 tahun paling ramai tinggal di bandar dengan umur paling menonjol ialah lingkungan 26 hingga 40 tahun, yang mencatat 72 peratus bagi julat umur tersebut, diikuti lingkungan umur 18 hingga 25 tahun yang mencatat 65 peratus bagi julat umur tersebut. Data ini menunjukkan daripada 48 peratus yang tinggal di bandar, 84 peratus adalah dari lingkungan umur 18 hingga 60 tahun. Data ini mengesahkan bahawa ramai orang muda daripada gereja BEM Hosanna Empili telah migrasi ke bandar disebabkan faktor urbanisasi. Taburan julat umur berdasarkan tempat tinggal dicartakan dalam Rajah 2.



Rajah 2: Taburan Julat Umur berdasarkan Tempat Tinggal

Analisa lanjut terhadap kaitan di antara tahap pendidikan dengan tempat tinggal mendapati bahawa lulusan Darjah Enam, Tingkatan Tiga dan yang tiada pendidikan formal yang paling ramai tinggal di kampung berbanding di bandar. Lulusan Tingkatan Lima dan ke atas paling ramai tinggal di bandar dengan yang paling menonjol ialah semua yang mempunyai lulusan Sarjana Muda dan Sarjana tinggal di bandar. Terdapat 90 peratus lulusan Sijil dan 70

peratus lulusan Tingkatan Lima turut tinggal di bandar. Data ini menunjukkan dari 48 peratus jemaat BEM Empili yang tinggal di bandar, 81 peratus mempunyai tahap pendidikan Tingkatan Lima ke atas. Data ini mengesahkan bahawa ramai orang orang berpendidikan dari gereja BEM Hosanna Empili telah migrasi ke bandar disebabkan faktor urbanisasi. Taburan tahap pendidikan berdasarkan tempat tinggal dicartakan dalam Rajah 3.




Rajah 3: Taburan Tahap Pendidikan berdasarkan Tempat Tinggal

Temubual dengan jemaat BEM Hosanna Empili berkaitan dengan aktiviti ekonomi mereka di kampung menonjolkan bahawa ramai mereka tidak lagi mengusahakan pertanian padi sawah mahupun padi huma kerana mereka sudah tidak berdaya disebabkan faktor umur, kurang orang yang dapat dibawa gotong-royong mengusahakan sawah serta hasilan yang tidak memuaskan berbanding dahulu. Keadaan ini dibuktikan dengan banyak kawasan bidang sawah yang sudah terbiar. Keberadaan nasi di dapur ditentukan melalui pembelian beras dari pasar.

Hasil temubual turut mendapati bahawa pertanian komoditi yang sebelum ini telah diusahakan oleh masyarakat di kampung ini seperti lada hitam, getah dan koko sudah banyak ditinggalkan kerana kos penyelenggaraan lada hitam terlalu tinggi berbanding dengan hasil yang hanya dapat dituai setahun sekali, serta harga komoditi getah dan koko yang terlalu rendah untuk keringat mereka berbaloi. Beberapa orang di antara mereka beralih kepada penanaman kelapa sawit kerana hasilnya dapat dituai lebih kerap dan adanya pusat

pengumpulan buah kelapa sawit yang berada kira-kita 13 kilometer dari kampung tersebut. Namun demikian, harga komoditi kelapa sawit yang menurun berbanding harga baja dan racun yang semakin meningkat oleh faktor urbanisasi global menyebabkan ramai



penduduk kampung yang bergantung kepada hasil pertanian hidup di bawah garis kemiskinan. Kekurangan pendapatan menyebabkan jemaat Gereja BEM Hosanna Empili tidak mampu mengumpul dana yang cukup untuk membayar gaji pastor. Trend harga minyak sawit dan harga baja sedunia dilampirkan dalam Rajah 4.

Rajah 4: Trend harga minyak kelapa sawit dan harga baja sedunia

Sumber: Trading Economics⁵ dan World Economic Forum⁶

Urbanisasi yang mendorong ramai penduduk luar bandar migrasi ke bandar menjadikan tumpuan pelayanan Kristian menganjak ke kawasan bandar. “Penjaja ikan lebih suka menjaja di kawasan yang banyak ikan” menggambarkan penumpuan pragmatik pada bidang yang menghasilkan pulangan yang paling besar.⁷ BEM Sarawak yang turut memberi penekanan tentang kepentingan penginjilan bandar menggalakkan dan menempatkan lebih ramai pastor di bandar. Galakan daripada BEM Sarawak serta faktor keselesaan, kemudahan dan kemampuan gereja-gereja BEM di bandar-bandar menggaji pastor mendorong lebih ramai pastor bertumpu ke bandar. Tidak dapat dinafikan bahawa pastor juga terkesan dengan faktor urbanisasi dan migrasi, sehingga gereja BEM di pedalaman seperti BEM Hosanna Empili tidak mempunyai pastor sejak berpindahnya Pastor Kingsly ke kawasan Miri pada tahun 2018.

Menangani Kesan Urbanisasi

Kanak-Kanak dan Orang Tua

Hasil kajian yang menunjukkan 72 peratus kanak-kanak berumur 12 tahun ke bawah masih berada di kampung, menunjukkan perlunya pelayanan Sekolah Minggu diaktifkan di BEM Hosanna Empili untuk melatih anak-anak ini mengenal Kristus daripada peringkat usia muda. Penyediaan awal dasar iman akan membantu mereka mempertahankan iman semasa mereka beralih ke peringkat remaja dan akan tinggal di asrama sekolah. Dasar iman ini diharap menjadi penggalak untuk mereka menghadiri dan terlibat aktif dalam Perjumpaan ISCF⁸ di sekolah-sekolah menengah, seperti SMK Balai Ringin.

⁵ “Palm Oil Price Chart Historical Data News,” Trading Economics, diakses 30 Disember, 2023, <https://tradingeconomics.com/commodity/palm-oil>

⁶ “This is how far in Europe is disrupting fertilizer supplies and threatening global food security,” World Economic Forum, 1 March, 2023, diakses 30 Disember, 2023, <https://www.weforum.org/agenda/2023/03/ukraine-fertilizer-food-security/>

⁷ Mark Hutchinson and John Wolffe, *A Short History of Global Evangelicalism*, 169.

⁸ Inter-School Christian Fellowship tersenarai sebagai aktiviti ko-kurikulum bagi pelajar-pelajar Kristen pelbagai denominasi gereja di

Peringkat umur 4 hingga 14 tahun adalah peringkat umur keterbukaan tinggi terhadap Injil, berdasarkan kajian yang telah dilakukan oleh *National Association of Evangelicals* pada tahun 2015. Kajian ini meninjau ahli mereka untuk mengetahui pada usia berapa ahli membuat keputusan paling penting dalam hidup mereka. Hasil kajian menunjukkan 63 peratus ahli membuat keputusan paling penting itu pada umur antara 4 hingga 14 tahun. Selepas usia 18 tahun, peratusan itu menurun secara drastik.⁹

Orang tua yang masih berada di kampung diperhatikan lebih menghargai Pelayanan Doa. Kunjungan ke rumah untuk mendoakan keperluan khusus dilihat memberi dorongan untuk mereka terus setia menghadiri kebaktian. Hal ini sejajar dengan beberapa cadangan yang disarankan oleh NECF Malaysia dalam menangani golongan tua, seperti kunjungan rumah, hubungan sosial dan bantuan fizikal untuk membolehkan orang tua dapat terus hidup dalam komuniti.¹⁰ Keprihatinan terhadap orang tua, terutama oleh pasukan yang datang mengunjungi jemaat akan membawa penghiburan terutama kepada mereka ini yang mengalami kesunyian kerana anak, menantu dan cucu tidak bersama mereka di kampung. Tindakan yang menyerlahkan kasih Kristus di kalangan orang tua ini akan menguatkan jemaat yang majoritinya terdiri daripada orang tua.

Migrasi Golongan Terpelajar

Migrasi golongan terpelajar ke bandar adalah lumrah kerana mereka dapat mengguna-pakai ilmu yang mereka ada di pelbagai bidang pekerjaan di bandar. Migrasi ini mengurangkan bilangan orang yang mempunyai latihan khusus seperti dalam bidang pengurusan yang berpotensi untuk memimpin gereja, bidang perakaunan yang berpotensi untuk menjadi bendahari gereja, bidang

sekolah-sekolah tertentu di Sarawak. Ia di bawah naungan Scripture Union Sarawak.

⁹ Teach Kids Articles, "The Window 4-14," Teach Kids Articles, 10 May 2021, diakses 29 Disember, 2023, <https://www.cefonline.com/articles/teach-kids-articles/the-4-14-window/>

¹⁰ Chan Kok Eng, "Contribution and Care of the Elderly: Some Perspectives", NECF Malaysia, diakses 31 Disember, 2023, <https://www.necf.org.my/newsmaster.cfm?&menuid=12&action=view&retrievid=29>

perhubungan awam yang berpotensi untuk menjadi setiausaha gereja dan sebagainya. Cabaran kepimpinan ini nyata dalam struktur organisasi gereja BEM Hosanna Empili, kerana daripada 11 orang ahli jawatankuasa gereja, hanya 27 peratus sahaja lulusan Tingkatan Lima dan yang selebihnya lulusan tingkatan tiga ke bawah. Melatih pemimpin gereja pedalaman dengan pelajaran teologia serta kaedah-kaedah pengurusan gereja harus diberi keutamaan.

Sumber untuk membimbing dan melatih pemimpin gereja pedalaman dengan pelajaran teologia serta kaedah-kaedah pengurusan gereja boleh dipertimbangkan oleh pasukan yang diutus oleh gereja-gereja bandar untuk mengadakan kunjungan. Pasukan ini perlu merancang program dan menggunakan masa kehadiran mereka di sana dengan sebaiknya. Sebagai contoh, format perjumpaan yang dibuat oleh pasukan dari BEM Kuching Bahasa Malaysia di BEM Hosanna Empili ialah menyelenggarakan Kebaktian Ahad dari pukul 8.30 pagi hingga 10.00 pagi, diikuti sesi perbincangan Alkitab dari pukul 10.30 pagi sehingga 11.30 pagi.

Mencungkil potensi kepimpinan adalah hikmat dari Allah. Rasul Petrus dan Rasul Yohanes bukanlah seorang yang terpelajar, seperti diakui oleh Majlis Agama Yahudi (Kisah Para Rasul 4:13). Kehidupan mereka bersama Tuhan Yesus Kristus selama kira-kira tiga tahun telah mengtransformasikan mereka sehingga membuatkan Majlis Agama Yahudi hairan dengan keberanian mereka. Saranan untuk mencungkil potensi kepimpinan dalam kalangan jemaat turut dikongsikan oleh Joseph Komar. Mereka yang berpotensi memimpin daripada kalangan jemaat ini perlu berada di bawah seorang pastor atau kakitangan yang tujuan utamanya adalah untuk memperlengkapi jemaat. Jemaat perlu diberi kuasa untuk menjadi lebih berkesan dalam konteks di mana pastor yang ditahbiskan tidak dapat berkhidmat.¹¹

Keterbatasan Ekonomi

Struktur ekonomi masyarakat di pedalaman lebih sukar dijangkakan kerana majoriti daripada mereka bekerja sendiri dalam bidang pertanian yang hasil dan pulangan modal tidak menentu, berbanding dengan rakan-rakan mereka di bandar yang ‘makan gaji’

¹¹ Joseph Komar, “Evangelism and Planting Churches of the Methodist Tradition in Malaysia,” *PELITA-The Methodist Church Newsletter* (April/May 2009), 13, diakses 31 Disember, 2023, <http://www.methodistchurch.org.my/newsmaster.cfm?&menuid=6&action=view&retrieveid=294>

dan dibayar gaji sekurang-kurangnya pada tahap gaji minimum yang berkala, biasanya setiap bulan. Di dalam ketidak-tentuan ini, amalan gotong-royong di kalangan penduduk pedalaman mengurangkan kos untuk mengerjakan sesuatu. Amalan gotong-royong yang menonjol dalam jemaat di BEM Hosanna Empili ialah semasa mendirikan bangunan gereja pada tahun 2009 sehingga 2011, serta semasa mendirikan pagar perimeter dan membaik-pulih bangunan gereja pada tahun 2023. Amalan tradisi gotong-royong ini sejajar dengan pengajaran Alkitabiah tentang kesatuan dalam jemaat dan merupakan satu aspek untuk mengatasi keterbatasan ekonomi.

Dana untuk membeli bahan bagi membina gereja tersebut pada tahun 2009 telah diperolehi daripada sumbangan gereja dari Korea Selatan¹² dan gereja BEM Kuching Bahasa Malaysia. Penglibatan misi tempatan dan misi antarabangsa seperti dalam contoh ini penting untuk membantu jemaat di pedalaman. Selain daripada pihak organisasi Kristian, pemerolehan dana juga dapat dipohon daripada agensi kerajaan seperti UNIFOR¹³ yang telah memberi bantuan kepada 635 buah gereja Borneo Evangelical Mission (BEM) dengan jumlah RM59.7 juta (17.9 peratus) daripada tahun 2017 hingga 2023.¹⁴ Peruntukan dari UNIFOR inilah yang telah digunakan untuk membeli bahan bagi mendirikan pagar perimeter dan membaik-pulih bangunan gereja BEM Hosanna Empili pada tahun 2023. Dua contoh ini adalah contoh kaedah bagi menangani keterbatasan ekonomi bagi membangunkan infrastruktur gereja.

¹² Gereja Jamsil Trinity (Rev Park Seong Eun) dari Seoul, Korea. Rev Park telah merasmikan gereja BEM Hosanna Empili pada 2 Mac, 2011.

¹³ Unit Hal Ehwal Agama-Agama Lain (UNIFOR), Jabatan Premier Sarawak, ditubuhkan pada 27 April 2017, sebagai unit baharu di Jabatan Ketua Menteri di bawah portfolio Timbalan Ketua Menteri Sarawak Yang Berhormat Datuk Amar Douglas Uggah Embas, ia adalah agensi Kerajaan Negeri yang bertanggungjawab mengawal selia dasar bagi menggalakkan keharmonian antara agama sambil menilai, mencadangkan dan menggubal dasar, undang-undang dan peraturan berkaitan agama lain di Sarawak.

¹⁴ Alexandra Lorna, "UNIFOR complex nearing completion, ready next year: Uggah," New Sarawak Tribune, 21 December 2023, 1:41pm, <https://www.newsarawaktribune.com.my/unifor-complex-nearing-completion-ready-next-year-uggah/#:~:text=15%20million%20to%20these%20religious,approximately%20300%20churches%20and%20chapels>.

Amalan memberi kewangan secara peribadi kepada tabungan gereja memerlukan pengajaran Alkitabiah tentang hal memberi. Terdapat banyak contoh daripada Alkitab. Contoh-contoh daripada Perjanjian Lama termasuklah Abram memberi sepersepuluh daripada segala harta bendanya kepada imam Melkisedek (Kejadian 14:20), bangsa Israel memberi persembahan sepersepuluh daripada hasil tanah kepada golongan imam (Imamat 27:30) dan janda miskin yang memberikan sepotong roti kepada Nabi Elia (1 Raja-Raja 17:11). Contoh-contoh daripada Perjanjian Baru termasuklah seorang anak kecil memberikan lima roti dan dua ikan (Yohanes 6:9), seorang balu yang miskin memasukkan dua keping wang tembaga ke dalam peti wang persembahan (Markus 12:41-44) dan gereja Makedonia yang walaupun sangat miskin, mereka memberi menurut malah melampaui kemampuan mereka (2 Korintus 8:1-5). Impak daripada pemberian-pemberian tersebut adalah di luar jangkaan. Kesedaran ini seharusnya memberikan dorongan kepada jemaat untuk setia dalam hal memberi dan memainkan peranan sebagai anggota-anggota tubuh Kristus yang berfungsi.

Ketiadaan Pastor Untuk Menggembala Jemaat

Ketiadaan pastor untuk mengembalikan gereja BEM di pedalaman bukanlah suatu perkara baru, malah akan menjadi semakin ketara pada masa akan datang. Ini kerana daripada pemerhatian kasar, nisbah bilangan pastor berbanding bilangan gereja menunjukkan jurang yang semakin lebar dari tahun 1982 sehingga 2019. Pada tahun 1982 nisbah bilangan pastor berbanding bilangan gereja ialah 84 peratus. Pada tahun 2011 nisbah bilangan pastor berbanding bilangan gereja menurun kepada 75 peratus dan pada tahun 2019, nisbah bilangan pastor berbanding bilangan gereja telah menurun lebih drastik kepada 71 peratus sahaja.¹⁵

Keadaan yang berlaku pada masa ini di gereja BEM Hosanna Empili ialah terpaksa berkongsi seorang pastor dengan tujuh kelompok yang lain. Ini menjadikan pastor tersebut tidak dapat meluangkan masa yang berkualiti dengan jemaat. Kebaktian Minggu terpaksa dianjakkan ke sebelah petang, diadakan tidak melebihi 45 minit, tidak ada kelas pengajian Alkitab atau sesi doa khusus kerana pastor tersebut perlu berkejar ke kelompok yang lain untuk menyelenggarakan kebaktian di sana. Peranan pastor yang terlalu

¹⁵ data diambil dari Pejabat Ketua BEM Daerah Kuching, 2023.

tipis jika berkongsi dengan bilangan kelompok yang banyak turut diakui oleh Joseph Komar dalam *Methodist Newsletter*.¹⁶

Satu pendekatan yang pernah dilakukan oleh gereja bandar seperti BEM Kuching Bahasa Malaysia ialah menjadikan gereja pedalaman seperti BEM Hosanna Empili sebagai gereja angkat mereka. Sumbangan yang dilakukan ialah menaja seorang pastor untuk ditempatkan di gereja BEM Hosanna Empili. Hasil pendekatan ini termasuklah lonjakkan bilangan keluarga yang berdaftar daripada 20 kepada 26 keluarga dalam tempoh empat tahun. Perkembangan Sekolah Minggu serta kolaborasi aktiviti bersama pasukan misi antarabangsa turut berlaku pada masa itu.

Pendekatan ini sukar diteruskan kerana kekurangan bilangan pastor yang dapat diutus untuk mengembalikan gereja pedalaman. Oleh itu pendekatan terkini oleh gereja BEM Kuching Bahasa Malaysia ialah mengutus ahli gereja yang mempunyai pendidikan teologia untuk mengunjungi gereja pedalaman ini secara konsisten sekali dalam sebulan untuk melaksanakan tugas pelayanan firman dan doa. Walaupun pendekatan ini bukanlah yang terbaik, ia sekurang-kurangnya dapat mengisi kekosongan yang disebabkan oleh ketiadaan pastor.

Kesimpulan

Urbanisasi adalah sesuatu fenomena yang tidak dapat dielakkan. Populasi bandar sentiasa meningkat dan populasi luar bandar semakin menurun saban tahun, terutama selepas inisiatif dasar utama kerajaan yang lebih berorientasikan pasaran pada tahun 1990-an. Perubahan ini lebih ketara disebabkan oleh proses migrasi dari luar bandar ke bandar. Penurunan populasi luar bandar turut memberi kesan kepada gereja di pedalaman.

Kajian ini telah berjaya mengenal-pasti kesan urbanisasi terhadap gereja BEM Hosanna Empili, Simunjan, Sarawak. Kesan yang menonjol adalah berkaitan dengan faktor umur, tahap pendidikan, ekonomi dan ketiadaan pastor yang mengembalikan

¹⁶ Joseph Komar, "Evangelism and Planting Churches of the Methodist Tradition in Malaysia," *PELITA-The Methodist Church Newsletter* (April/May 2009), 13, diakses 31 Disember, 2023, <http://www.methodistchurch.org.my/newsmaster.cfm?&menuid=6&action=view&retrieveid=294>

jemaat. Semua kesan ini harus ditangani dengan sebaik mungkin supaya gereja di pedalaman dapat terus berfungsi dengan mampan.

Terdapat beberapa pendekatan yang dapat dilakukan oleh jemaat sendiri dalam menangani kesan urbanisasi terhadap mereka. “Tetapi umat yang mengenal Allah mereka akan tetap kuat dan akan bertindak dengan berani” (Danial 11:32b). Sebagai umat Tuhan, transformasi cara berfikir melalui pembelajaran Alkitab dapat menyingkirkan pola fikiran “*victim mindset*” – tidak layak, tidak mampu – yang dipengaruhi oleh faktor usia dan tahap pendidikan. Mereka juga harus rendah hati dan terbuka untuk mendapatkan bantuan dan bimbingan daripada komuniti Kristian atas dasar kasih Kristus, serta berusaha mendapatkan bantuan daripada agensi kerajaan.

Komuniti Kristian di bandar juga mempunyai peranan membantu gereja di pedalaman menangani kesan urbanisasi. Pengutusan pekerja, penyaluran dana dan meningkatkan kolaborasi yang berpusat pada kasih Kristus harus dipertimbangkan. Gereja yang berfungsi dan mampan harus tetap menyerlahkan kemuliaan Tuhan.

Bibliografi

- Chan, Kok Eng. "Contribution and Care of the Elderly: Some Perspectives", NECF Malaysia. Diakses 31 Desember, 2023.
<https://www.necf.org.my/newsmaster.cfm?&menuid=12&action=view&retrieveid=29>
- Hutchinson, Mark and Wolffe, John. *A Short History of Global Evangelicalism*. Cambridge University Press, 2012.
- Komar, Joseph. "Evangelism and Planting Churches of the Methodist Tradition in Malaysia," PELITA-The Methodist Church Newsletter, (April/May 2009). Diakses 31 Desember, 2023,
<http://www.methodistchurch.org.my/newsmaster.cfm?&menuid=6&action=view&retrieveid=294>
- Lorna, Alexandra. "UNIFOR complex nearing completion, ready next year: Unggah," New Sarawak Tribune, 21 December 2023, 1:41pm,
<https://www.newsarawaktribune.com.my/unifor-complex-nearing-completion-ready-next-year-unggah/#:~:text=15%20million%20to%20these%20religious,approximately%20300%20churches%20and%20chapels>
- Niermann, Matthew. "Ten Questions That Will Shape 2025," Lausanne Movement, 6 January, 2023. Diakses 14 November, 2023,
<https://lausanne.org/about/blog/ten-questions-that-will-shape-2050>
- World Economic Forum. "This is how far in Europe is disrupting fertilizer supplies and threatening global food security," 1 March, 2023. Diakses 30 Desember, 2023,
<https://www.weforum.org/agenda/2023/03/ukraine-fertilizer-food-security/>